

News Clippings

(Strictly for internal circulation only)

Date	Day	Khamis	Date	16	Month	September	Year	2021
Publication	Berita Harian							
Headline/Title	Atlet Paralimpik terima ganjaran RM100,500 dari Yayasan OSK							
Page/Section	https://www.bharian.com.my/sukan/lain-lain/2021/09/865058/atlet-paralimpik-terima-ganjaran-rm100500-dari-yayasan-osk							
Compiled by	Group Corporate Communications							



September 16, 2021 @ 11:36pm

Atlet Paralimpik terima ganjaran RM100,500 dari Yayasan OSK



Atlet lompat jauh negara, Abdul Latif Romly memenangi pingat emas acara lompat jauh T20 pada temasya Sukan Paralimpik Tokyo 2020 di Stadium Olimpik Tokyo pada 4 September lalu. Abdul Latif menerima ganjaran sebanyak RM15,000 dari Yayasan OSK atas kejayaannya itu. - Foto BERNAMA.

KUALA LUMPUR: Pencapaian luar biasa atlet negara di Sukan Paralimpik 2020 terus mendapat perhatian pelbagai pihak dan hari ini mereka menerima insentif kewangan daripada Yayasan OSK, cabang amal Kumpulan OSK.

Yayasan itu menyumbangkan ganjaran berjumlah RM100,500 untuk diagihkan kepada 22 atlet para negara dan Majlis Paralimpik Malaysia (MPM).

Dalam majlis yang berlangsung menerusi aplikasi Zoom, atlet powerlifting Bonnie Bunyau Gustin, Cheah Liek Hou (badminton) dan Abdul Latif Romly (lompat jauh) yang memenangi pingat emas di Tokyo menerima RM15,000 setiap seorang, sementara pemenang perak Jong Yee Khie (powerlifting) dan Chew Wei Lun (boccia) masing-masing membawa pulang RM10,000.

Sebagai tambahan, lain-lain atlet Paralimpik Malaysia menerima RM1,500 seorang di atas kesungguhan dan dedikasi mereka sementara RM10,000 juga disumbangkan kepada (MPM) di atas usahanya dalam menyokong pembangunan gerakan paralimpik di dalam negara.

"Kami sangat berterima kasih dan berbesar hati untuk menyokong atlet yang menunjukkan bakat luar biasa dan kesungguhan di Sukan Paralimpik Tokyo 2020 biarpun menghadapi kekangan," kata Ketua Pegawai Eksekutif Yayasan OSK, Cheryl Ong.

"Pencapaian mereka memberi inspirasi kepada semua rakyat Malaysia (bukan hanya mereka yang kurang upaya) untuk menjalani hidup yang aktif dan penuh azam, mempercayai kebolehan sendiri, bekerja lebih keras dan berani untuk memiliki impian besar,".

Presiden MPM, Datuk Seri Megat D Shahrizan Zaharudin amat gembira dengan apa yang dilakukan Yayasan OSK.

"Saya akui ini adalah sumbangan terbesar daripada sesebuah organisasi swasta sebagai penghargaan kepada atlet para kita dan MPM. Dengan sumbangan dan semangat yang diberikan, saya rasa bertenaga semula untuk mengetuai dan memacu pergerakan sukan para di dalam negara ke peringkat lebih tinggi.

"Saya berharap lebih banyak organisasi korporat akan tampil ke hadapan untuk melengkapkan usaha kerajaan mempromosi pergerakan sukan untuk 15 peratus daripada masyarakat kita yang dikategorikan sebagai orang kurang upaya di negara ini," katanya.